

ԱՔՈՐԻ

Մակերես՝ 24.8 կմ²

Բնակչություն՝ 2987

Բնակավայր Ալավերդու տարածաշրջանում, Ալավերդի քաղաքից 3կմ հարավ-արեւելք, մարզկենտրոնից գտնվում է 52կմ հեռավորության վրա: Նախկինում ունեցել է Ագորի, Ախորի, Ախուրի, Ակոռի, Աքոռի անվանումները: Տեղադրված է Ալավերդի-Վանաձոր ավտոմայրուղու վրա: Անվան ծագումնաբանությունը ոմանք կապում են «ախոռ» բառի հետ, ենթադրելով, որ այստեղ եղել է իջեանատուն եւ «մսուր» (ախոռ) ձիերի համար:

Գյուղը տեղադրված է Լավար լեռան հարավ-արեւելյան ստորոտին, սարավանդում՝ ծովի մակարդակից 1400մ բարձրության վրա: Կլիման բարեխառն լեռնային է, տեւական , ցուրտ ձմեռներով: Ամեն տարի հաստատվում է կայուն ձնածածկույթ: Ամառները տաք են, համեմատաբար խոնավ: Տարեկան թափվում են 600-700մմ մթնոլորտային տեղումներ:

Ագրոկլիմայական տեսակետից ընկած է մասնակի ոռոգման գոտում:

Նախկինում գյուղը պատկանել է կոմս Լոռիս Մելիքովներին (Լոռվա մելիքներին): Գյուղի հարավ-արեւելքում գտնվում է ս. Գեւորգ եկեղեցին: Ունի նաեւ Բղավոր եկեղեցին, մատուռ:

Գյուղի բնակիչների նախնիների մի մասը տեղափոխվել է Թբիլիսիի եւ Ստեփանավանի շրջաններից: 1897 թ-ին ունեցել է 824, 1926 թ-ին՝ 1169, 1939 թ-ին՝ 1816, 1959 թ-ին՝ 1701, 1979 թ-ին՝ 2235 հայ բնակիչ: Ըստ ազգային վիճակագրական ծառայության տվյալների 2005 թ-ին համայնքի բնակչությունը կազմել է 2903 մարդ: Սեռային կազմում տղամարդիկ կազմում են 45%, կանայք՝ 55%: Ունի 2 միջնակարգ դպրոց, գրադարան, ծննդատուն, բուժկետ, մանկապարտեզ, կապալի հանգույց:

Գյուղատնտեսական հողահանդակներում մեծ բաժին ունեն վարելահողերը (203հա), խոտհարքեր (201հա): Պետական հողերը գլխավորապես օգտագործվում են որպես արոտավայրեր, վարելահողեր, խոտհարքեր՝ կազմելով համապատասխանաբար 702, 42, 52 հեկտար: Գյուղի մասնագիտացման ուղղությունը երկրագործությունն է: Զբաղվում են պտղաբուծությամբ (տանձ, խնձոր, կեռաս), դաշտավարությամբ, մշակում են հացահատիկային, կերային, բանջարաբուստանային կուլտուրաներ: Զբաղվում են նաեւ խոշոր եղջերավոր անասնաբուծությամբ, մեղվաբուծությամբ:

Համայնքի հիմնախնդիրների մեջ կարեւորվում են դպրոցական գույքի նորացումը, խմելու ջրագծերի վերանորոգումը, գյուղատնտեսական մթերքների իրացումը, գյուղամիջյան ճանապարհների վերանորոգումը: